

Detelpai presidenta Mirella!

L nef Consei de l'Istitut Cultural Ladin à tacà l lurier con na scontrèda slarièda che à metù dant entendimenc e prospetives



Sèn Jan - L Consei de aministrazion, la Comiscion culturala e l personal de l'Istitut Cultural Ladin é stac envié enstadì a na scontrèda slarièda che aea l fin de "passèr la consegnes" ai neves componenc e vardèr intendimenc e prospetives che l nef Consei de l'istituzion scientifica se met dant al scomenz de so mandat.

A la scontrèda "tel cher religious e culturèl de Sèn Jan, te chel tobià che podessa rejonèr de duta la storia che l'é passà apede chesta breeves veiores" descheche à dit dantfora l nef president de l'ICL Antone Polam, l'é stat envià ence la presidenta da dant Mirella Florian, per ge palesèr duc adum l deelpai fon per aer corì la encèria



La scontrèda di componenc del Consei de Aministrazion, de la Comiscion culturèla, e del staff de lurier de l'Istitut Ladin.

con gran pascion e gaissa.

"Chisc egn per me l'é stat na gran ocajion – à dit la prof.a Florian – e spere de esser stata a l'auteza de l'encèria". La risposta é ruèda chièra da la paroles del president Antone Polam e del diretor Fabio Chiocchetti, apede che dai biliec che à compagnà i dons che ge é stat sport: n bel chèder de Igi Pederiva, don "istituzionèl", e n maz de fiores col braciacol de dut l personal de l'Istitut.

Dò i ringraziamenc, l'é stat l'ocajion per meter dant e descorer fora programes e obietives, pean via dal besegn de jir inant sul troi – semper rencurà da l'Istitut de Fascia – de se averjer a duta la valèdes ladines, de chierir de se arvejinèr a la comunanza e de rencurèr la colaborazion con l'autra istituzions e sociazions.

L prum frut de la colaborazion metuda a jir anter la desvaliva istituzions de val (Comprenjorie, Istitut, Scola, Union di Ladins) sarà la scomenzadiva "Aisciuda Ladina" en program dai 3 ai 7 de mé che vegn. (lg)